

欽定剿平粵匪方略

欽定勦平粵匪方略卷二百七十九 辛酉年

十一月十四日

戊戌

慶端奏言逆首李侍賢等久

踞金華併力圍攻嚴州僞忠王李秀城由衢州  
被擊下竄據探報嚴州府城於九月十七日不  
守嚴州一水直達省城紹興水陸分歧處處皆  
虞竄越嚴州一失則杭紹岌岌可危亟須速集  
精銳之師分路進剿前皖南道李元度管帶楚

勇六千二百名已抵衢州臣已飭令與候補總  
兵林文察迅由衢州進剿臣所調漳泉金廈等  
處兵勇不敷調遣查安肅道劉于濤及知府丁  
峻統師數千名均在江西屢著戰功現在江省  
肅清已飛咨江西撫臣毓科飭調來營臣趕籌  
軍餉定於十日之內整旅起程左宗棠已行抵  
廣信相應請

旨飭下左宗棠兼程入浙會剿以維大局湯溪龍游  
之賊接據探報已竄至處州之松陽等縣處州  
緊接溫州竊恐平陽匪徒勾結滋擾臣已飭叅  
革候補道張啟煊帶隊馳赴處州堵剿仍令兼  
顧溫州不得稍有疏虞

慶端又奏言

臣奉

命統師赴浙督剿現已催調水陸兵勇剋期起程惟

用兵必先求將查前任陝安鎮總兵秦如虎由  
廣西至金陵轉戰數省膚公疊著前經浙江撫  
臣王有齡會摺奏准飭令募勇赴浙該總兵招  
募楚勇五百名已行抵江西臣現飭令統帶所  
募楚勇迅速來閩隨營調遣奏入

上命議政王軍機大臣傳諭曾國藩左宗棠慶端毓  
科曰杭州萬分危急左宗棠既已行抵廣信著卽

星馳入浙將衢嚴等處匪徒速行掃蕩並卽進援  
省城毋稍遲緩李元度林文察兩軍卽著左宗棠  
會同慶端催令前進應由何路進剿並著妥爲調  
派安肅道劉于濬等所帶各軍向稱得力現值江  
西肅清卽著毓科迅調赴浙總兵秦如虎現在江  
西並著毓科催令統帶所募楚勇迅速赴閩並酌  
給糧餉左宗棠等兵餉著慶端毓科源源接濟其

鮑超一軍能否派令援浙並著會國藩妥籌調派  
慶端現已擇期出省著確探左宗棠消息如該京  
卿已經入浙該督卽遵前旨於閩浙交界地方駐  
紮爲援浙諸軍後路聲援兼顧閩省防務以免疏  
失所調漳泉等處兵勇仍著飛催赴浙松陽等處  
賊匪卽飭已革道員張啟煊拔隊速往堵剿

十六日

庚子

護理浙江提督參將陳世章奏言金

嚴逆匪分股竄擾蕭山縣城於九月二十四日  
不守諸暨縣城與紹興府城隨於二十六二十  
九等日失陷杭省自十月初一日以後文報不  
通探聞該逆圍撲省城勢甚緊急亟應撥兵往  
援迅解城圍惟刻下賊勢蔓延全省震動兵力  
不敷抽調處州郡城亦於九月十七日失守新  
昌縣聞亦被陷該處爲甯郡後路調撥兵勇



顧此失彼實難兼顧惟有仰懇

天恩飭下附近鄰省迅調勁旅分由水陸來浙相機  
進剿並多撥餉銀以救眉急庶全省尙有轉機  
督臣遠駐閩疆若輟轉稟陳入奏未免久稽時  
日用敢瀝陳以達

宸聽

陳世章又奏言逆首李侍賢勾結僞忠王李秀

城等繞由桐新餘杭一帶迫近省城本月初二日將九龍頭牯口及饅頭山一帶衛城營盤悉行攻踏以致省垣四面合圍廣西提臣張玉良督率況文榜等由九龍頭沿河一帶節節轟擊連踏賊卡數座直至鳳山門外江干搶紮營盤三座該逆以數十萬衆一面攻城一面撲我新營張玉良等所帶兵勇衆寡懸殊未能直抵城

下省垣十分危急相應請

旨迅飭左宗棠星速統兵入浙以支危局

同日王履謙奏言連接探報嚴州府城已於九月十六日被陷桐廬富陽相繼失守上游一帶盡是賊蹤撫臣王有齡所用之八槳礮船潛與逆匪勾通旋由臨浦攻陷蕭山縣城提臣饒廷選與藩司林福祥本係統領重兵專防諸暨一

路嗣將防兵萬餘名全數調赴蕭山以致諸暨  
失守臣奉

命幫辦團練並無統兵之責縱欲收集隊伍相機調  
遣無奈事權未屬呼應不靈該逆自占踞蕭山  
後卽率領大股入寇紹興郡垣臣督飭官紳晝  
夜防守旋因城外逆類愈聚愈多民團不克抵  
禦致賊匪一擁而入臣當卽率衆巷戰因賊衆

勇單幾遭不測幸賴紳民救護出城紹興之失  
亦由八槳礮船搶劫滋事知府廖宗元調處不  
善激成民變以致人心渙散大勢瓦解臣雖無  
統兵之任但幫辦浙江團練實屬罪不容逭惟  
有仰懇

皇上將臣交部嚴加議處現在浙省兵勇不敷調遣  
郡縣疊陷勢甚岌岌並乞

聖恩迅飭閩浙督臣慶端星夜統領重兵救援浙省  
以顧大局均奏入

上命議政王軍機大臣傳諭曾國藩左宗棠慶端曰  
本日護理浙江提督陳世章及王履謙奏紹興蕭  
山諸暨俱陷並杭省萬緊各等語此時張玉良於  
鳳山門外搶紮營盤中隔逆壘未能直抵城下杭  
城未有一旅應援何能力解城圍前經疊次寄諭

曾國藩等速籌援浙之師此時惟有左宗棠一軍  
能由常山玉山一路飛速進兵取道三衢與李元  
度一軍設法援杭尙爲切近著曾國藩左宗棠迅  
卽妥籌務遵前旨星速馳援毋稍延緩慶端尙未  
督兵出省此時杭甯情形萬緊閩浙海道可通務  
將派援浙省兵勇及糧餉鉛藥先由海道駛運甯  
波出賊不意方能有濟抑或水陸分道設法赴援

之處卽著該督迅籌辦理李元度一軍現在衢州  
並著曾國藩左宗棠飭令與入浙楚師會合分投  
攻剿迅解杭圍克復紹郡賊踞江浙膏腴之地勢  
將聯成一片諒該大臣等必能迅籌援剿埽蕩逆  
氛定不視同隔膜致蹈遷延貽誤之咎

同日工部右侍郎宋晉奏言粵寇竄踞江甯復  
蔓延蘇常嘉興等府安慶池州雖經克復而廬



州無爲和州等處與皖南之甯國太平等府皆  
爲賊窟兩江督臣曾國藩經營防剿一載有餘  
始得與官文胡林翼會合以全力攻復安慶惟  
所部不足二萬人東援西剿兵分力單而賊復  
於今春竄入黃州等處致楚師有返顧之虞足  
見賊衆我寡是以頻年攻戰迄未掃蕩爲今之  
計惟有增兵益餉使之可分可合可聚可散而

後可大舉東征爲一勞永逸之計今試以四川  
湖北湖南江西安徽五省言之通計五省歲入  
無慮千數百萬以之養能戰之兵勇十二萬人  
以二萬人爲四川防剿之師以二萬人爲安徽  
防剿之師以三萬人分駐扼要之地爲湖北湖  
南江西三省防剿之師以五萬人合湖北之水  
師爲東征之師十二萬人寬爲籌備月需銀七

十餘萬兩各省以所入之多寡勻計不過月出銀十數萬兩已能餉足兵增尙各留有餘可供緩急之用二三年間江浙郡縣恢復粵寇翦除則勇可散而兵可罷所謂一勞永逸之計也應請

飭下四川湖北湖南江西安徽五省督撫合而爲一通籌本省防剿及東征兵餉如臣所試擬者是

否足敷辦理務須合力同心迅速籌定卽以東  
征兵餉交曾國藩李續宜彭玉麟楊載福由長  
江督率下行賊知上游大舉東征勢必返顧我  
軍聲勢聯絡高屋建瓴數千里江山形勝屹然  
有不可動搖之氣象不特東征速奏膚公卽江  
淮半壁亦益增鞏固矣惟今欲合五省共圖一  
事必先令五省合爲一家五省之督撫合爲一

人則兵可轉弱爲強餉可轉絀爲盈庶能剋期  
收效並乞

飭下官文曾國藩駱秉章等悉心妥議期於協力同  
心共圖大舉奏入

上命議政王軍機大臣傳諭官文曾國藩駱秉章彭  
玉麟李續宜毛鴻賓曰侍郎宋晉奏通籌東南大  
局請合五省會剿等語逆匪以金陵爲巢穴蘇常

等郡縣悉被竄踞安徽湖北湖南江西四川賊蹤  
四出防不勝防現在浙江紹郡又陷省城情形危  
急若不迅圖大舉掃穴揜渠籌餉籌兵迄無了局  
該侍郎所籌五省會剿各情不爲無見著官文會  
國藩駱秉章李續宜毛鴻賓彭玉麟等將此摺所  
陳各情悉心妥議是否可以照辦之處迅速據實  
具奏

十七日

辛丑

都興阿奏言探得秦欄迤北後石橋

地方逆匪紮營四座約有二三千人屯聚肆掠

復有逆衆由觀音門通江集陸續渡江併力援

應臣密飭候補副都統海全等統帶兵勇馳抵

秦欄相機剿辦復派參將刁經明統帶所部爲

後路援應該逆出壘抗拒海全等督飭馬步各

隊分路進剿立將東西賊壘踏破共斃賊二千

餘人生擒賊匪六百餘名奪獲槍礮器械無數  
查該逆屢次垂涎淮揚沃壤屢經官軍隨時擊  
退此次窮極思竄幸各營弁兵奮勇異常大挫  
賊鋒可否籲懇

恩施由臣擇尤酌保陣亡把總宋高亮應請  
飭部照例從優議卹奏入

上諭內閣曰此次逆匪竄擾秦欄迤北地方紮營屯



聚經副都統海全等督飭各隊分路進擊踏破東西賊壘斬馘無算勦辦尙爲得手所有在事出力員弁著准其擇尤保奏陣亡把總宋高亮著交部照例從優議卹

同日

上命議政王軍機大臣傳諭曾國藩曰昨據王履謙奏逆匪勾通王有齡所用之八槳礮船由臨浦攻

陷蕭山縣城提督饒廷選與藩司林福祥統兵防守諸暨一路嗣將防兵全數調赴蕭山以致諸暨被陷調守紹郡之八槳船因知府廖宗元調處不善兵民成仇人心渙散遂致紹興府城被陷等語王履謙幫辦浙省團練浙東一帶是其專責此次賊犯紹興該員一籌莫展蒼黃出城據奏以並無統兵之責等語委過於人實屬居心巧詐著曾國

藩將所奏各情查明嚴行叅奏饒廷選林福祥究  
在何處駐紮知府廖宗元如何調處不善以致兵  
民解體現在各文武如何下落王履謙是否督團  
接仗抑係先期逃避出城均卽查明迅速具奏

上諭內閣曰昨據王履謙奏賊匪大股攻陷蕭山諸  
暨紹興府城相繼失陷覽奏曷勝憤懣王履謙以  
在籍大員幫辦團練平時漫無布置臨難蒼黃出

城厥咎已無可追乃覽其摺內所稱竟有並無統  
兵之責縱欲收集隊伍無奈呼應不靈各等語飾  
詞委卸居心尤屬巧詐若照所請予以嚴議尙不  
足以蔽辜前任都察院左副都御史王履謙著卽  
革職拏問交會國藩查辦如有棄城逃避情事卽  
行嚴叅治罪紹興等處文武各員下落並著會國  
藩王有齡查明具奏

十八日壬寅慶端奏言浙省軍興以來疊奉

諭旨飭令臣統師赴浙督勦逆匪現在水陸兵勇分  
起徵募本定於十月十六日起行赴浙詎平陽  
會匪竄伺福甯金華之賊復竄陷處州郡城福  
甯界連溫處福州北路頓形緊急省垣爲之震  
動是以臣不得不先爲布置以免顧彼失此之  
虞浙省軍務已奉

旨飭令左宗棠督辦合無仰懇

天恩飭令左宗棠統師迅速入浙以救危急臣現將北路及各海口趕爲布置卽日親統將士星速出省擇要駐紮與左宗棠合力勦辦迅圖掃蕩所有左宗棠營中軍餉本由江西供應惟有額懇

聖恩飭下江西撫臣毓科按月接濟並請

飭下毓科迅發援師由衢州進取蕞程入浙以期迅  
掃逆氛至總兵李定太前奉

旨飭赴徐州幫辦徐宿剿匪事宜自應趕緊赴徐惟  
該員現在衢州督辦防剿軍情緊要相應請

旨將李定太暫留浙江統師剿辦一俟軍務稍鬆再  
令赴徐奏入

上命議政王軍機大臣傳諭慶端瑞璿曰前因浙省

軍務喫緊已令左宗棠馳往勦辦疊諭慶端駐紮  
閩浙交界地方相機防勦現據該督奏稱因平陽  
會匪窺伺福甯北路可虞俟布置稍定再行起程  
是該督尙未定有出省日期浙江爲該督兼轄省  
分值此賊氛日熾斷難膜視慶端著遵照前旨速  
行出省於閩浙交界地方擇要駐紮會同左宗棠  
將進勦事宜妥商辦理毋許再事遷延致干重咎



甯波待援急切自應分撥兵勇及糧餉鉛藥由海道前往出賊不意合力夾擊並著迅速妥爲籌辦總兵李定太著准其暫留浙江俟軍務稍有轉機再赴徐州幫辦勦匪事宜

上又命議政王軍機大臣傳諭毓科曰前因浙省待援孔亟當諭令毓科派安肅道劉于濬等統帶兵勇星速援浙本日據慶端奏浙省軍情萬緊局勢

垂危而平陽會匪竊伺福甯未能剋期援浙金華  
之賊復陷處州郡城著毓科迅催劉于潯等水陸  
各軍星速入浙所有左宗棠等軍入浙後軍餉並  
著毓科迅速籌解源源接濟無令缺乏

同日

上諭內閣曰軍興日久因各路官兵不敷勦辦復召  
募勇丁乃近來各路軍營官兵則往往缺額勇丁

則徵調紛繁兵日少而勇日增不可不豫爲之計  
各勇丁起自鄉團近來隨同官軍打仗出力者正  
不乏人一經各路統兵大臣保奏無不破格施恩  
優加官職此後如有技勇精嫻戰陣出力者各該  
統兵大臣督撫卽於存營缺額兵數挑選充補一  
俟軍務告蒧該勇丁有願歸農者卽妥爲遣散如  
仍願效力行閒卽分隸各標挨補兵額從此爲國

宜力懋賞同膺用副朕造就戎行之至意

二十六日

庚戌

上諭內閣曰署漕運總督江甯布政使王夢齡著來京以五品京堂候補所遺江甯布政使著吳棠補授並著兼署漕運總督督辦江北糧臺其江北鎮道以下各員弁均著歸吳棠暫行節制

二十七日

辛亥

上命議政王軍機大臣傳諭吳棠曰現在各軍沿江  
掃蕩攻克無爲等州縣袁甲三亦奏報克復來安  
似賊匪畏懼楚軍有圖他竄之意都興阿一軍兵  
力無多萬一賊勢北竄則清淮最關緊要所有漕  
河兩標兵丁本爲押運防河而設現在運漕旣經  
暫停則兩標兵丁正堪爲勦賊之用著吳棠督飭  
各營挑補足額實力操演以資堵勦

二十九日

癸丑

慶端奏言查紹興失陷後省垣士

分危急李元度一軍雖由衢州拔隊前進而中  
隔賊氛急切難赴杭垣聞總兵鮑超經曾國藩  
飭令馳赴甯國攻剿查甯國與杭州府屬之於  
潛昌化均屬毗連若鮑超由於昌取道援杭可  
以朝發夕至相應請

旨飭令曾國藩飛調該總兵就近援杭以維東南大

局前陝西陝安鎮總兵秦如虎現已到閩該總  
兵向帶湖南兵勇較爲熟習湖南撫標右營千  
總馬朝龍久厯戎行仰懇

聖恩飭下湖廣督臣湖南撫臣飛調鎮筸兵一千名  
交馬朝龍帶領入浙歸秦如虎統帶俾成勁旅  
並懇

飭催左宗棠日入浙督辦江西撫臣迅發援師庶

可漸圖埽蕩奏八

上命議政王軍機大臣傳諭慶端曰浙江省城四面賊氛鮑超一軍取道於潛昌化尙恐中途或有阻滯未能剋日抵抗鎮筭兵遠道來援且須繞越江西前進尤恐未能卽日援救浙省待援孔亟著慶端卽日親統兵勇馳赴閩浙之交擇要駐紮聽候楚軍消息以便居中調度妥爲策應如浙省軍情



甚緊左宗棠尙未能到慶端卽須督兵出省督率  
秦如虎相機前進迅解杭圍毋得遷延貽誤致干  
重咎

上又命議政王軍機大臣傳諭官文曾國藩毛鴻賓  
毓科曰據慶端奏杭城危急總兵鮑超現經會國  
藩派令進攻甯國請飭該總兵卽由於潛昌化取  
道援杭並請調鎮筓官兵歸秦如虎統帶等語賊

衆圍攻杭州情形危急由衢州赴援官兵急切難以抵省鮑超旣經曾國藩派赴甯國去杭最近著卽飭該總兵統率所部由於潛昌化星馳赴杭力解城圍湖南鎮筵官兵素稱驍勇著官文毛鴻賓調派一千名交馬朝龍管帶赴浙歸秦如虎統領以期得力左宗棠曾否督兵入浙並著曾國藩迅催前進前諭毓科飭令道員劉于濤等帶兵援浙

著毓科飛催前進毋任逗留

慶端又奏言查逆匪竄陷松陽縣城後於九月十七日直撲處州郡城我軍開放槍礮奮力剿擊因衆寡不敵該逆乘勢竄入郡城署總兵特保等退守石帆地方收集兵勇於十八日帶隊由東路進攻把總朱邦英等督率礮船水勇由中路直抵南門該逆出城拒敵我軍水陸並進

斃賊極夥該逆潰敗入城現派委遊擊黃載清  
管帶台勇一千名馳赴處州交特保調遣進剿  
迅圖恢復奏入

上諭內閣曰處州府城失陷著慶端卽飭派出之遊  
擊黃載清迅速赴援處州責成特保等剋期進攻  
收復郡城如再遷延貽誤卽將該署鎮據實嚴叅  
治罪其餘文武員弁有無聞警先逃情事並著查

明分別衆辦

欽定勦平粵匪方略卷二百八十 辛酉年

十二月初一日

甲寅

翰林院侍講學士楊

言江蘇爲財賦之區自上年四月失守以後百姓久陷於水深火熱之中方引領以求援無如撫臣薛煥株守上海莫展一籌總督曾國藩駐兵皖境力主上游之說必期克復金陵後再圖蘇常但金陵攻克尙需歲時蘇浙唇齒相依必

皇朝通志卷之四十三  
一  
先復蘇然後可復浙曾國藩現據金陵上游軍  
威方盛賊匪悉銳抗拒蘇省之守必虛莫若更  
得一知兵大臣率銳師攻蘇此兵家擣虛之法  
今左宗棠已奉

命援浙即可提援浙得勝之師取道嘉興再  
簡良將率師取道太湖分路並進更請

飭令巡撫薛煥山上海乘機進剿力圖恢復則浙省

之勢不孤而蘇常可復從此直搗金陵與曾國  
藩兩面夾勦較之從前向榮張國樑由下游一  
面進兵成功自易夫事機之得失全在人心蘇  
常淪陷有年儻再需之歲時賊與民習民爲賊  
脅滋蔓更恐難圖莫若乘此人心迫切呼籲之  
時亟圖克復官軍所至必皆響應使東南半壁  
迅就蕩平



朝廷不缺維正之供天下大計莫踰於此奏入

上命議政王軍機大臣傳諭曾國藩左宗棠曰楊秉

璋奏自上年四月蘇常失守以後人心迫切待援

薛煥株守上海一隅不能進取儻再需之歲時賊

與民習更恐滋蔓難圖請飭左宗棠移援浙得勝

之師取道嘉興另派良將取道太湖與薛煥上海

之師分路攻蘇力圖恢復等語所奏是否可行著

曾國藩左宗棠迅速妥籌辦理該大臣等洞悉兵機惟當及早通籌全局蕩平東南半壁迅奏膚公所有現在布置情形及進剿機宜卽著妥籌議奏

初四日丁巳掌山東道監察御史薛春黎奏言安

徽安慶一府雄據江口對瞰皖南徽池諸郡足以控制前人於此建立省會意至深遠自咸豐三年正月賊匪攻陷安慶後大股全趨金陵安

慶城池並無賊踞失守未久旋經收復其時若能嚴密防堵力保此城則不惟無再陷之憂並可遏上竄之賊無如督師諸臣見不及此自周天爵等奏請改建省會於廬州安慶守禦空虛直至三年七月閒賊匪窺其無備漸圖占踞蠶食各屬分陷舒廬旁擾徽甯全皖遂致糜爛查安慶府城一面枕山三面濱江且居吳楚之交

爲楚鄂江右門戶又爲金陵鎮江上游振裘挈  
領莫要於此若省會改於廬州則僻處皖北一  
隅非惟皖南一帶鞭長莫及且距江較遠無從  
設防所以年來安徽一省四分五裂徽甯則委  
之浙江潁亳則委之河南安慶則委之湖北如  
人一身血脈全不貫通且賊艘來往自如屢次  
上竄以致武昌疊陷江右騷然脣亡齒寒均由

自撤藩籬未得形勝故也幸楊載福等舟師順  
流扼截故楚北肅清安慶克復軍威丕振應請  
旨飭將安徽省城仍建於安慶府巡撫藩臬等官如  
前駐紮以循舊制查安徽提督向係巡撫兼銜  
皖北僅設壽春一鎮兵力較單似宜添設提督  
大員統轄水陸各營節制南北二鎮以資彈壓  
江西之九江府與安慶地勢切近並請將九江

一鎮就近歸安徽新設提督節制則聲勢聯絡  
江防更爲周密議者謂設官必須添兵添兵必  
須增餉或嫌事涉紛更然利害宜權其重輕而  
法制貴因時通變查福建廣東兩省均設水陸  
提督各一員原以海防緊要用壯軍威現在江  
防較海防尤重可否於該二省內裁併一缺移  
設安慶則兵餉無須另籌而地方實有神益奏

八

上命議政王軍機大臣傳諭曾國藩彭玉麟統科曰  
御史薛春黎奏請將安徽省城仍建安慶並添設  
提督統轄水陸各營等語賊匪踞有長江之險以  
致江皖糜爛現在安慶克復亟應整頓江防所稱  
安徽省城仍應建於安慶巡撫藩臬如前駐紮並  
設立提督統轄水陸官兵九江鎮並歸節制則聲

勢聯絡江防更爲周密所奏不爲無見卽著曾國  
藩彭玉麟毓科就現在地方軍務情形悉心籌畫  
會同妥議具奏至所請於福建等省裁缺以資移  
設之處應俟該大臣等覆奏到日再降諭旨

初五日

戊午

薛煥奏言十一月初七日據陽湖縣

知縣楊溥稟稱委解軍火米糧運至澈浦卽換  
船駛進鼉子壺直達錢塘江螺螄埠探悉杭州



十城門均有賊營阻隔不能運送入城江干有  
總兵況文榜紮營四座該總兵因陸營及礮船  
均缺火器當將洋礮驗收配用又因兵勇乏糧  
先支米一千數百石散給各營餘俟設法解圍  
再行送入城中至湖州無路可通難以分解該  
委員自杭回滬臣面詢杭州軍情據稱省城被  
圍四十餘日賊匪有數十萬之多廣西提督張

玉良前在閩家堰收集潰軍赴省救援由江干  
滾營前進連獲勝仗急欲攻破賊壘與守城官  
軍聯絡疊次躬親督仗致受礮傷殞命係況文  
榜接統其軍該逆堅築木城數十里使內外不  
能通氣遂以全力攻城撫臣王有齡自九月二  
十日登陴駐守鳳山門會同將軍副都統分派  
司道府縣嬰城固守人心尙爲鎮定惟兵民無

從得食勢難持久上下游均已被賊隔絕現祇  
澈浦海上可換小船入江而賊踞海鹽縣城距  
澈浦僅二十餘里慮其斷我餉道等語臣卽飛  
飭守備張大剛管帶原防吳淞口礮船十五號  
星夜駛往澈浦駐泊以保糧路一面飭司再行  
籌款接濟並飛咨況文榜及總兵吳再升等派  
隊疏通進城之路速將餉糈等物護送入城聞

道員李元度一軍現由衢州轉戰而前如能速到當可立解城圍至浙東一帶自紹興府城被賊竄踞諸暨新昌嵊縣上虞餘姚均已先後失守該逆卽分兩路竄入甯屬一由慈谿一由奉化勾結土匪圖撲府城存城兵勇不過四千餘人前聞紹興克復並非確信甯波亦恐難保福建援師亦未來浙前聞太常寺卿左宗棠駐紮

河口奉

命援浙儒能督率勁旅與李元度合軍馳至先解杭州之圍再行東渡以圖甯紹庶大局得有轉機臣自當竭力圖維設法兼顧不敢稍存推諉

薛煥又奏言探報甯波府城已於十一月初八日失守並陷鎮海縣城該逆現在擄掠釣船爲縱橫海上之計查近年招徠商販推廣釐捐甯

波海船出入大江已成熟路吳淞口係入江要道尤爲上海門戶亟應嚴密防堵惟署提臣曾秉忠所統礮船分布江浙交界水路各要隘尙嫌單薄臣卽於松江寶山各防抽撥礮船十餘隻飭赴吳淞口駐泊無如皆係內河小艇若令駛入大洋尙不足恃現在大江水師有大小戰船三百數十號船身堅實熟習波濤堪以就近

應援應請

飭下江甯將軍都興阿黃巖鎮總兵黃彬卽派得力  
將弁管帶戰船數號駛赴吳淞口扼泊如賊航  
海北趨准臣再行隨時咨調應由都興阿黃彬  
豫飭各鎮將遇有警信立卽飛馳堵截奏入

上命議政王軍機大臣傳諭薛煥曰賊匪於攻陷甯  
波後擄掠釣船爲縱橫海上之計薛煥業已抽撥

礮船前往吳淞口駐紮著卽責成該帶兵官會同  
都興阿等派出師船實力防勦毋稍疏失惟蘇浙  
利害相關總須力援杭湖方免唇亡齒寒之患現  
在鼉子壘入江之路尙屬可通著薛煥悉心籌畫  
如能雇募水勇一二千人派委得力員弁統帶卽  
由鼉子壘駛赴杭州與況文榜等軍聯絡聲勢力  
解城圍最爲妥善該撫接奉此旨務卽迅速辦理



毋稍延誤至銀米軍火等項除業經解往外仍須源源接濟不得觀望遷延致有貽誤

上又命議政王軍機大臣傳諭曾國藩左宗棠曰薛煥奏甯波府城失守紹興所屬各縣均被賊踞現在擄掠釣船爲縱橫海上之計杭城被圍四十餘日張玉良礮傷殞命前由上海雇船從鼉子疊入江運送軍糧礮火接濟杭省因有賊營阻隔不能

運入城中兵民無從得食等語杭城危急萬狀曾  
國藩節制四省責無旁貸前經諭令籌撥楚師援  
浙尙未據該大臣覆奏著卽懷遵前旨迅速派調  
並將布置情形速行馳奏前據慶端奏左宗棠行  
抵廣信此時諒已入浙著卽會合李元度一軍星  
馳赴杭力保危城毋稍遷延至鮑超一軍現駐甯  
國距杭州省城較近若由廣德州取道入浙旣可

徑援杭城兼可分援湖郡或徑由徽郡取道於潛  
昌化進援杭城並著會國藩飭令該總兵相機辦  
理至甯波一帶前已諭令慶端將派援浙省兵勇  
及糧餉鉛藥由海道駛赴該處助剿著左宗棠於  
杭城解圍後分兵接應力圖克復浙東各城毋令  
久踞

上又命議政王軍機大臣傳諭都興阿黃彬曰薛煥

奏浙江賊匪竄踞紹興府城後諸暨新昌嵊縣上  
虞餘姚等縣失守分道由慈谿奉化撲陷甯郡並  
陷鎮海縣城現在擄掠釣船以爲縱橫海上之計  
請嚴防吳淞口等語著都興阿黃彬卽派得力將  
弁管帶戰船數號飛速駛赴吳淞口扼泊萬一賊  
欲航海北趨准薛煥隨時咨調並著都興阿等務  
飭各鎮將如聞有警立卽飛駛前往堵截以固長

江要口

上又命議政王軍機大臣傳諭慶端毓科曰前因浙江軍務緊急屢諭慶端速行出省督勦調兵由海赴援並諭令毓科調派劉于濬等兵勇入浙救援茲據薛煥奏浙省自紹興失守賊衆數十萬圍攻杭州張玉良中礮殞命探聞紹興府屬各縣悉行失陷甯波府城亦復失守著慶端仍遵前旨卽於

臺灣漳泉等水師內挑選精銳數千名配齊船礮糧餉派委得力大員統帶剋日由海道馳赴浙江探明捷徑迅速救援杭州其溫州黃巖等處水師並著慶端一併派撥由海援杭其前調陸路援軍仍著催令分路進攻如事機緊急慶端卽親督各軍出省赴援不得稍涉延誤前諭毓科調撥援浙兵勇未據覆奏現在浙省待援急迫著該撫遵照

前旨督催道員劉于潯等星速統兵前赴浙江相機進剿此外如尚有可撥之兵並著添撥設法繞道前進毋許稍存畛域之見致有貽誤

初八日辛酉曾國藩毓科奏言近年以來江西屢

被賊擾本年三月七月僞侍王李侍賢僞忠王李秀城先後由江入浙皆以廣信爲出入之途是欲保江西宜於廣信設防欲援浙江宜從廣

信進兵必然之勢也自紹興失守杭州危急臣等日夜憂懼以浙境一日不靖則江西一日不安屢次函商救浙之策無如地廣兵單不敷分布而浙中賊勢浩大亦非數千人所能救解臣國藩現令鮑超一軍由青陽前進朱品隆一軍由石埭前進會剿甯國欲以分制浙中賊勢第恐僞輔王悉衆堅守勢難遽拔甯郡之城卽不



能少解浙江之阨惟幫辦軍務太常寺卿左宗

棠久駐廣信距浙較近其平日用兵取勢甚遠

審機甚微近日屢與臣等書函毅然以援浙爲

已任督臣慶端撫臣王有齡亦奏請左宗棠統

軍入浙臣等往返熟商卽請左宗棠督率所部

進援浙江並將駐防徽州之臬司張運蘭駐防

廣信之道員屈蟠駐防玉山之道員王德榜參

將顧雲彩駐防廣豐之道員段起各軍及副將  
孫昌國內河水師均歸左宗棠就近節制調度  
左宗棠現駐廣信距臣國藩安慶行營已隔千  
餘里入浙以後相去更遠聲息難通遇有轉奏  
請

旨之件誠恐耽延貽誤嗣後該處一切軍情應由左  
宗棠自行奏報以期迅速至其所部各營與信

防各軍欠餉太多臣等擬將信郡各屬本年錢  
漕撥歸徵收以清廣玉各軍積欠並將河口景  
鎮婺源釐金撥歸該京卿以清各營積欠俟各  
軍整飭就緒卽行分途進發內防外剿進止遲  
速均由左宗棠相機辦理

曾國藩毓科又奏目前奉

諭旨飭催衢州鎮總兵朱品隆迅赴本任臣查浙江

危急情形在杭州甯紹而不專在衢州欲拯浙江之危宜以大隊直赴省垣不宜僅顧衢防臣等現擬飭左宗棠一軍由廣信進兵以救浙江上游鮑超一軍由甯國進兵以分浙中賊勢至總兵朱品隆一軍兵數不滿三千不能獨當一路臣已令鮑超由池州進青陽朱品隆由祁門進石埭然後會合一路以攻甯國該二軍者分

支則互爲聲援缺一則不能獨進衛州自解圍  
以後防務較鬆閩浙督臣慶端奏明卽日赴衢  
督勦李定太似可抽身赴衢不必待朱品隆前  
往接替且朱品隆久帶湘勇征皖數年形勢熟  
諳留皖則人地相宜赴衢則難期得力審度情  
勢自以先赴甯國爲妥奏入

上命議政王軍機大臣傳諭會同藩左宗棠毓科曰

會國藩毓科奏探知紹興失守杭州危急商令左宗棠督率所部赴援並將張運蘭等軍均歸調度一切軍情由左宗棠自行奏報並將廣信府錢糧河口等處釐金撥作所部各營兵餉所籌深協機宜惟浙省自紹興失守後甯波鎮海兩城復被攻陷賊匪圍攻杭州萬分危急著會國藩催令左宗棠統領所部迅速前進其臬司張運蘭道員屈蟠

王德榜段起副將孫昌國參將顧雲彩等水陸各軍均照議悉歸左宗棠調遣一切軍情卽著左宗棠自行奏報該京卿務須間道設法馳救杭州再圖收復各城方爲妥善左宗棠軍餉前曾諭令毓科籌撥除廣信本年錢漕撥抵廣玉各軍積欠河日景鎮婺源釐金撥抵左宗棠所部各營積欠均照會國藩等所議辦理外其該京卿進剿軍餉仍

著毓科源源接濟毋許遲誤至道員劉于潯知府  
丁峻兵勇四千四百名應否仍照前諭調派赴浙  
卽著曾國藩左宗棠毓科斟酌辦理其鮑超一軍  
現在青陽著照該大臣所擬飭令會合朱品隆分  
道並進迅攻甯國以制浙中賊勢如或有閒道可  
以馳援杭州湖州均著飭令該總兵等相機酌辦  
前諭總兵朱品隆速赴衢州本任現在李定太業



已留衢朱品隆著准其留於甯國勦匪暫緩前赴  
衢州

同日

上命議政王軍機大臣傳諭玉明文煜崇厚譚廷襄  
曾國藩薛煥慶端勞崇光耆齡曰昨因薛煥奏探  
聞浙江甯波鎮海府縣城池失守賊匪擄掠釣船  
爲縱橫海上之計吳淞口爲上海門戶亟應嚴密

防堵當經諭令都興阿黃彬派撥戰船前赴吳淞  
口設防並諭慶端速調水師由海援浙薛煥雇募  
水勇由鼇子疊入江救援杭州矣惟該逆旣擄掠  
艇船意圖游擊各直省沿海地方均屬可慮上海  
尤爲密邇逆氛此時若僅於隘口設防不圖克復  
甯波鎮海終恐有防不勝防之患慶端接奉疊次  
寄諭著卽於臺灣漳泉等營及浙省之溫州黃巖

等水師內挑選精銳數千名配齊船礮糧餉派委  
得力大員統帶駛赴甯波會合陸軍迅速攻克甯  
波鎮海兩城毋任該匪久踞其援杭各軍仍催令  
飛速前進廣東水師並著勞崇光耆齡酌調數千  
名派員統帶駛赴甯波會剿薛煥於雇募水勇救  
援杭州外並著會同曾國藩悉心籌辦如有可調  
水師卽著一面奏聞一面調赴甯波會合閩廣兩

省派出官兵進剿至奉天直隸山東福建廣東等  
省應防海口雖去浙省較遠惟該匪旣圖縱橫海  
上自亦不可不防並著玉明文煜崇厚譚廷襄慶  
端勞崇光耆齡嚴密設防其各省水師應如何分  
別整頓均著速爲籌辦至各省商船往來南北海  
口深恐爲匪徒勾結或該匪冒作商船藉以竄擾  
均應豫爲防範並著玉明等將各省海口商船編

列字號於進出海口時由該管文武實力稽查以杜該匪影射毋許日久生懈

初九日壬戌毛鴻賓奏言粵逆石遠關糾合潯州

賊匪由閒道繞入楚境徘徊靖州綏甯之交分黨四出焚掠意在牽掣我師伺閒西竄以圖假道入川臣當卽飛催副將趙福元馳赴辰谿地界探賊所向橫擊咨總兵劉培元管帶水師礮

船由常德上駛扼守辰沅江面咨署貴州撫臣  
江忠義催調粵西援軍及知府席寶田副將周  
達武王永章各營分路前進並飭鎮筵鎮道揀  
派兵練習同靖州沅州各屬地方官整團扼截  
該逆於竹枝江結筏渡河仍留大股屯踞東山  
分擾靖州偏近綏甯邊境疊經該州縣督率兵  
練擊退江忠義於前月十九二十等日拔營急

趨洪江令席寶田等自綏甯搜勦而西是時賊  
之大殺已向會同竄走十九日直撲會同縣城  
和縣鄧爾昌亟率兵民登陴捍禦賊焚城外房  
屋悍黨乘勢登城鄧爾昌受傷跌落城下團丁  
槍負以行縣城遂陷席寶田周達武王永章等  
追勦至燕子灣探聞該逆前隊已趨普寺腳圍  
攻官軍營壘江忠義由洪江馳往策應其會同

巖村等處尙屯踞大股悍賊抗我追師席寶田等派隊進剿巖村先將附近白樂沖都水各賊館壩蕩賊踞高嶺我軍由閒道攀登奮擊賊卽併竄會同席寶田周達武等分路進攻連破賊卡賊復以大隊三路抗拒我軍分三路應之賊敗歸一路猶復列陣抗拒席寶田等揮軍衝盪十餘次斃悍賊數百名副將周洪印等自靖州



馳至知縣鄧爾昌復率團勇來會賊挾輜重奪  
路狂奔各營追殺五六里先後斃賊二千餘人  
生擒悍賊二十餘名立將會同之賊擊退其圍  
攻普寺腳之賊經江忠義指揮軍士縱橫盪決  
鏖戰三時石逆墜馬兩次千總江忠倬縱馬衝  
殺逆衆拌死救去共斃賊二千餘人賊衆已趨  
木坪馬鞍山與會同尾股賊合將由江西街托

口分渡沅江江忠義親率各營繞道兼程攔擊  
席寶田等由洪江躡賊之後副將趙福元由安  
江橫擊兼顧黔陽臣復飭已革總兵楊名聲帶  
勇五百名循沅江而上聯絡水師扼守隘口力  
遏下竄現在來鳳一股原係石逆餘黨十月十  
七二十八等日屢撲龍山縣城雖經我師擊卻  
兵勇亦有傷亡賊勢究未大挫鄂省已調候補

道劉嶽昭率師由施南進剿湖南方以全力剿辦石逆龍山兵勇僅二千餘人隘口紛歧防軍不敷分布恐賊匪糾合竄擾兇熾愈張臣已調副將朱升開參將陳盛世移紮桃源前候補總兵鄭陽和募勇一營並赴桃源暫駐如辰州一帶防務漸鬆卽使由永定相機前進會合蜀鄂官軍迅掃來鳳股匪以杜石逆勾結之謀署會

同縣知縣鄧爾昌於縣城被擾時雖查無退避  
情事且隨同官軍將賊擊退惟究屬疏於防範  
應請革職留任把總王玉蘭守備曾獻高外委  
蕭桂林力戰捐軀請

飭部各照本職從優議卹在事出力文武員弁兵勇  
可否由臣擇尤保奏出自

天恩奏入

上命議政王軍機大臣傳諭官文李續宜毛鴻賓江忠義曰粵逆石達開由閒道繞越楚境徘徊靖州綏甯之交分黨四出焚掠經各路兵團擊勦大股悉竄會同縣城復經江忠義等軍擊退斬獲甚多其來鳳一股原係石逆餘黨攻撲龍山雖屢經擊卻而其閒隘口紛歧誠恐與石逆大股糾合賊勢日張道員劉嶽昭一軍已由施南進勦來鳳之賊

著官文李續宜迅飭該員會合湖南各軍奮力進剿務將此股賊匪速就殲除一俟楚境肅清仍飭該道率領所部前赴四川交駱秉章調遣湖南方以全力剿辦石逆大股龍山兵勇甚單毛鴻賓調赴桃源之總兵鄭陽和等軍著卽飭令相機速進會合北省之兵先將來鳳股匪蕩平以免石逆勾結石逆全股尙在沅江著江忠義督軍兜圍迅速

殄滅毋令免脫以免蔓延

上諭內閣曰此次粵逆石達開糾合潯州賊匪繞入楚境經署貴州巡撫江忠義知府席寶田副將周達武等分途力戰連破賊卡斃賊二千餘人辦理尙爲得手著毛鴻賓等飭令各將弁乘勝窮追務將逆匪盡數殄除毋留餘孽署會同縣知縣鄧爾昌雖查無退避情事並隨同官軍將賊擊退惟究

屬疏於防範著革職留任以觀後效陣亡把總王  
玉蘭守備曾獻高外委蕭桂林均著各照本職從  
優議卹在事出力員弁兵勇著毛鴻賓擇尤保奏  
毋許冒濫

毛鴻賓又奏言臣惟軍興以來東南數省因額  
兵不盡足恃更議募勇湖南首倡義旅各省踵  
而行之於是勇多於兵湖南之勇又居十之七



八各省督撫習聞湖南勇丁得力紛紛委員前來招募而於所以得力之故未加詳察震其名而昧其實弊將不可勝言臣查湖南自前安徽撫臣江忠源辦理團練剿平雷再浩股匪後粵西賊起率以從征始有楚勇之名迨前雲貴督臣張亮基四川督臣駱秉章先後撫楚虛已求賢知人善任適兩江督臣曾國藩在籍奉

旨幫辦團防日以忠義激勸鄉人又得太常寺卿左  
宗棠文武兼資之才從而贊助之其時募勇章  
程首以擇將爲主自將領營官至百長什長逐  
加遴選遞相鈐制凡勇夫皆取具的保其姓名  
籍貫戶鄰團長逐一登註按籍可稽是以無事  
則守營規有事則遵軍令臣詳加考究備悉張  
亮基等經營籌畫實具苦心非貿貿然呼聚數

百千人遂可驅之戰陣也至於帶勇之多寡又必因其人之才力爲等差用兵日久有積功保至提鎮副將而實不能將千人者任之苟失其宜終必至於債事賊匪蔓延數省擾攘十年游手亡命之徒所在皆有殺人放火視爲故常投身入營則恃勢橫行非獨虞目前之潰決更恐滋異日之隱憂從前三省教匪之役戡定後重

更令滋事勇丁前往肆虐已函咨嚴樹森毛永  
熙囑其不可爲周鳳山所誤此外如浙江江西  
等省募勇之員亦皆接踵而來臣若概行禁止  
似覺畛域區分而利害攸關要不能不權衡以  
期有濟大抵兵無強弱視將之強弱爲轉移求  
將之道當觀其深識有短長才有大小未可一  
概論也抑臣更有慮者湖南兵勇援剿鄂皖江

浙兩粵黔蜀及留防本省合計數十萬人以一  
省之才應天下之需勢必有所不給而目前湖  
南農工兩途已覺事多人少招募不已其弊不  
使田野荒蕪不止夫人才原不擇地而生亟應  
各就各省搜求幽隱果能本至誠懇切之心作  
忠義勇敢之氣奇傑之士必有聞風而起者不  
必湖南之勇始能殺賊湖南之人盡能當勇也

仲懇

飭下直省督撫及各路統兵大員認真選將就地取材務使募一勇卽得一勇之力不可驚虛名而買實禍庶不至虛糜糧餉貽誤事機奏入

上命議政王軍機大臣傳諭毛鴻賓曰毛鴻賓奏縷陳招勇流弊所奏切中事情不爲無見已寄諭各督撫及各路統兵大臣認真選將就地取材不得

專恃楚勇致滋流弊嗣後各省如有前赴湖南募勇之員並著毛鴻賓隨時察看酌量妥辦

上又命議政王軍機大臣傳諭僧格林沁勝保官文曾國藩左宗棠袁甲三田興恕都興阿馮子材田在田毛鴻熙直隸江蘇安徽山東河南福建浙江江西湖北四川廣東廣西雲南各督撫曰毛鴻賓奏縷陳招勇流弊請飭直省各督撫及統兵大臣

慎重辦理等語所奏切中時弊均屬可採用兵之道擇將爲先求將之道當量其識之短長才之大小以爲器使且該督撫及各路將帥誠能虛心採訪何地無才不必湖南之人始能充勇湖南之勇始能殺賊嗣後各直省督撫及各路統兵大臣務當認真選將就地取材按照湖南募勇章程妥爲辦理其所派募勇之將領尤須酌量該員才具果



能帶勇若干方令其募勇若干庶因材器使不致  
統率無方至所募之勇籍貫來厯尤應認真嚴查  
不得以游手之人濫竿充數尤不得上下相隔竟  
至將與勇兩不相識一旦有警賊匪得以濶入勇  
中無從覺察以致貽誤事機湖南湖北所募之勇  
在各軍營率多勇敢善戰各省如有前赴湘鄂募  
勇之員並著知會該二省督撫隨時察看妥爲辦

理

上又命議政王軍機大臣傳諭嚴樹森毛昶熙曰軍  
營募勇原以濟兵力之不足以期綏靖地方若如  
毛鴻賓所奏副將周鳳山所募之勇尙未招集而  
其差官倚勢兇橫滋擾局卡已經如此若使成軍  
以出其騷擾地方更可概見河南被賊蹂躪地方  
業已糜爛豈堪再令滋事勇丁到處肆虐嚴樹森

不知底蘊徒采虛聲勢必爲其所誤著嚴樹森毛  
昶熙酌量情形如可無須該副將勇丁前來助勦  
迅卽咨照毛鴻賓將周鳳山所募之勇截留毋須  
調派其豫省軍務卽著嚴樹森毛昶熙另派得力  
將弁認真防勦儻該副將已帶勇赴豫卽著嚴樹  
森等留心察看如有滋擾情事卽將勇丁資遣回  
楚毋任逗留貽害

同日馮子材魁玉奏言臣等於十一月二十三日聞賊在鎮江城東茶山岡肆擾距城僅十餘里卽派總兵陶茂森率副將黃武賢帶馬隊往剿小有斬獲二十四日復派總兵富陞陶茂森等帶領馬步各隊官兵在城外附近地方剿捕正值逆匪千餘犯我丹徒水營經參將林宜華等開礮轟擊斃賊甚多該逆向橫山凹逃竄富

陞等引馬隊邀截斬擒無算又據探報白兔寶

堰丹陽諸賊分路撲城逆衆共約數萬臣等卽

派總兵朱承先等率領馬步各隊一千五百名

由西路九華山進剿並派參將黃長發秦禮國

率領楚勇防堵高資之賊調陶茂森率領副將

文龍德等旗綠各營兵勇一千五百名由南路

甘棠橋進剿於二十五日兩路並進陶茂森一

軍將至甘棠橋卽與賊遇參將林從太飛馬直  
前陣斬執旗悍賊一名文龍德等率馬隊繼進  
陶茂森指揮諸將令步隊包抄羣賊且戰且退  
守備梁朝嘉等臨陣均有斬擒朱承先率軍迎  
勦西路之賊陣斬賊目數名羣賊越山逃竄二  
十六日朱承先陶茂森各率所部一由鹽街進  
攻一由橫山凹堦勦均將該逆擊退斬擒尤衆

連日共斃賊八百餘名生擒二十餘名查逆匪  
由江犯鎮聚黨衆多續准江甯將軍都興阿咨  
皖匪又與常州逆黨勾結由方仙橋一路來犯  
鎮江鎮營兵勇自上月以來日事防剿迄無休  
暇臣等率已革總兵蕭知音督同在防將士嚴  
守內外兩城時虞逆匪另股攻撲現在兵力較  
少防剿不敷擬咨請揚防撥兵援剿奏入

上命議政王軍機大臣傳諭都興阿馮子材魁玉曰  
江皖大股逆匪撲犯鎮江勢極滋蔓距城僅十餘  
里雖經馮子材派隊出擊小有斬擒而大股賊勢  
尙未挫敗鎮江爲南北咽喉關係緊要現在兵力  
較少防剿不敷馮子材等擬咨行揚州軍營撥兵  
援剿著都興阿迅速挑派勁旅遴委得力將弁管  
帶前赴鎮江協剿馮子材等務卽激勵將士會同



揚營兵勇將城外屯聚賊壘悉數殲除毋令久踞  
江北防務及沿江水面一帶並著都興阿黃彬督  
飭水陸官兵一體嚴防毋令賊匪乘閒竄渡本日  
已明降諭旨令魁玉幫辦鎮江軍務該副都統務  
須督率駐防旗兵與綠營聯爲一體以期無誤防  
剿

同日

上諭內閣曰江甯副都統魁玉著幫辦鎮江軍務